



Nano -- nanu?

Vo Nano mechte mir hit brichte
und doo derzue e Zeedel dichte!
Mit Schrägge froggt me drum, oh jee,
wär het denn scho e Nano gsee?

Die Nanodail sin unsichtbar,
drum isch es uns nit immer klar,
wie iber unsichtbari Sache
mir aigetlig wänn Fasnacht mache?

E Nano syg uff all Fäll munzig,
ebs eggig oder villicht rund syg
gseen d Wissenschafter nur, gottlob,
im Elektronemikroskop.

Mir aber sin e bitz die Dumme,
und luegen ys bi Google umme,
und lääse allerhand Artikel
jetz iber die Nano-Partikel.

Doch merggt me, wenn me s gnau studiert,
s isch alles furchbar kompliziert.
Und s ainzig, wo mir wirgglig wisse:
Will mir nyt wisse, simmer bschisse!

Die ultraglaine Nanodail
die syge nämlich supergail!
Vyl Zauberstoff, Wunderprodukt,
kasch druus härstelle, s isch verruggt.

Textilie, komplett wasserdicht,
sin byspilswys e soon e Gschicht.
Wird unser Goschdym nie mee nass,
isch das fir uns e tolle Gspass!

Au wunderlychti Sportgräät gits,
Carbon-Velo -- das isch kai Witz!
Dr Cancellara, s isch jo gspunne,
hätt ohni Nano gar nit gwunne!

Es schafft e mängge in sym Sport
dangg Nano-Hightech e Rekord,
und nur mit Nano fliegt zur Zyt
dr Simi Ammann däwäg wyt!

Die Nano-Tächnik dät vyl nutze,
muesch d Fänscherschybe nimme butze,
au wärde d Koffer nimme dräggig,
und d Sportdress iberhaupt nit fläggig.

Das Nano-Gmisch gits regulär,
ob Handy, Nuggi, Teddybär,
ob Medizin und ob Kosmeetik,
me froggt sich nur, ischs wirgglig neetig?
Mit Nano-Gräämli, s isch e Gryz,
wird jedi Gumsle grad Miss Schwyz!
Und au mir Alti Garde-Pfunzle
hänn Nano-Salbi geege d Runzle!

Denn simmer alli prächtig gliftet,
wohrschynlig aber au – vergiftet!
Wär waiss denn, ob das Material
nit gfäärlig isch? Das wär fatal!

S git Ruggständ vo so Nanodail,
die geen in d Luft, das isch s Unhail!
Si geen in d Lunge und ins Bluet,
me waiss nit, was das schaade duet!

Die Zwärgtächnik syg e Gfoor,
so giftig wie Asbest ungfoor.
Und d Forschig warnt vor Katastroophe,
nur unsre Staat duet als no schloofe!

E Rauchverbot wird duregstiert,
dr Nano-Staub glatt ignoriert!
Doch isch dä wohrschynts, dien mir wette,
vyl schlimmer als e Zigarette!

Vo Sunne-Grääme, dasch no krasser,
blybt jedes Nanodail im Wasser!
Nur merggt das niemer, gopfridstutz,
wo isch denn doo dr Umwäلتchutz?

D Behörde dien aim nit uffklääre!
D Politiker wänn lieber kääre!
Und s ainzig, wo mir wirgglig wisse:
Will mir nyt wisse, simmer bschisse!

Nano -- nanu? So frooge mir,
die ganzi Sach isch zimlig wirr!
Mir hoffe fescht, s gäb jetz zum Loon
nit nur e Nano-Subventioon!

D Ladäärne-Usstellig uff em Münschterplatz und d Waage-und Requisite-Usstellig bi dr Kasärne sin vom Mändig znacht bis am Mittwoch demorge offe.
Dört ka me au alli Zeedel und Schnitzelbängg, d Blaggedde und dr Rädäbäng kaufe.

Drugg: Runser Druck & Satz AG, Basel